



Na: 30. Msimu wa Kilimo 2017/18 Tathmini ya Kipindi cha Julai 21-31, 2018 na Matazamio kwa Kipindi cha Agosti 01-10, 2018

Muhtasari

- Vipindi vya hali ya ukavu vinavyo tarajiwa vitasaidia kukomaa kwa mazao pamoja na shughuli za uvunaji na uhifadhi. Hata hivyo hali hiyo itasababisha upungufu wa maji na malisho kwa mifugo.
- Mvua za nje ya msimu zinazoendelea katika baadhi ya maeneo hazitoshelizi kwa upandaji wa mazao ya msimu.
- Wafugaji wanashauriwa kuchukua hatua stahiki ikiwa ni pamoja na matumizi endelevu ya maji na malisho.
- Wakulima wanashauriwa kuhifadhi ziada ya chakula kuepuka upungufu wa chakula.

MIFUMO YA HALI YA HEWA KATIKA KIPINDI CHA JULAI 21-31, 2018.

Katika kipindi cha siku kumi zilizopita (dekadi), migandamizo mikubwa ya hewa iliyopo kaskazini mwa dunia (Azores na Siberia) iliendelea kudhoofika wakati ile iliyopo sehemu ya kusini mwa dunia (St. Helena na Mascarene) ilikuwa imeimarika. Ukanda wa mvua (ITCZ) ulielekea kaskazini zaidi.

Joto la bahari katika maeneo ya kusini magharibi mwa bahari ya Hindi lilikuwa la wastani na kusababisha kutokuwepo kwa vimbunga baharini. Upepo ulivuma kutoka kusini hadi kusini mashariki katika maeneo mengi ya nchi. Eneo la Kusini mashariki mwa bahari ya Atlantiki (karibu na pwani ya Angola) kuliendelea kuwepo na joto la bahari la wastani hadi juu kidogo ya wastani. Hali hii ilisababisha kupunguza kwa mifumo ya kusababisha mvua katika maeneo ya magharibi mwa nchi.

MWENENDO WA MVUA KATIKA KIPINDI CHA JULAI 21-31, 2018.

Katika kipindi cha siku kumi zilizopita, sehemu kubwa ya nchi ilikuwa kavu isipokuwa vipindi vifupi vya mvua za nje ya msimu zilinyesha katika baadhi ya maeneo yanayopata misimu miwili ya mvua hususan maeneo ya nyanda za juu kaskazini pamoja na maeneo ya Pwani ya kaskazini, ambapo yalipata mvua chini ya milimita 25.

TATHMINI YA HALI YA KILIMO KATIKA KIPINDI CHA JULAI 21-31, 2018.

Katika kipindi cha dekadini iliyopita, maeneo mengi yanayopata msimu mmoja na miwili ya mvua kwa mwaka shughuli za uvunaji wa mahindi zimemalizika isipokuwa kwa mikoa ya Iringa, Mbeya, Singida, Rukwa na Njombe, Morogoro, Simiyu, Mara, na Kilimanjaro. Maeneo yote yanayojishughulisha na kilimo cha pamba na Mpunga, wakulima wanamalizia kuvuna.

Hali ya maji na malisho kwa ajili ya wanyama ilikuwa ya kuridhisha isipokuwa mikoa ya Dodoma na Tabora ambapo maji yameanza kupungua.

HALI YA MAJI ILIVYOKUWA KATIKA KIPINDI CHA JULAI 21-31, 2018.

Kina cha maji katika mabwawa, mabonde na mtiririko wa maji katika mito ilikuwa ya wastani, isipokuwa bonde la ziwa Victoria na Pangani ambapo hali ya maji inaonesha kuwa nzuri zaidi.

**MIFUMO YA HALI YA HEWA
INAVYOTARAJIWA KATIKA KIPINDI CHA
AGOSTI 01-10, 2018.**

Katika kipindi hiki migandamizo mikubwa ya hewa iliyopo kaskazini mwa dunia (Azores na Siberia) iliendelea kudhoofika wakati ile iliyopo sehemu ya kusini mwa dunia (St. Helena na Mascarene) inatarajiwa kuendelea kuimarika. Ukanda wa mvua (ITCZ) unatarajiwa kuendelea kusogea kuelekea kaskazini hali itakayopelekea upepo kuvuma kutoka kusini hadi kusini mashariki katika maeneo mengi ya nchi. Joto la bahari la wastani hadi juu ya wastani linatarajiwa katika eneo la kusini magharibi mwa bahari ya Hindi hali itakayoondoa uwezekano wa kutokea vimbunga katika bahari. Upepo unatarajiwa kuvuma kutoka kusini hadi kusini mashariki hali itakayopelekea hali ya baridi katika maeneo mengi ya nchi. Eneo la Kusini mashariki mwa bahari ya Atlantiki (karibu na pwani ya Angola) kunatarajiwa kuwa na joto la bahari la wastani hadi juu kidogo ya wastani. Hali hii itapelekea kupunguza kwa upepo uvumao kutoka magharibi hivyo kupunguza nguvu ya mifumo isababishayo mvua katika maeneo ya magharibi mwa nchi.

**HALI YA HEWA INAVYOTARAJIWA KATIKA
KIPINDI CHA AGOSTI 01-10,2018.**

Katika kipindi cha siku kumi zijazo Kanda ya ziwa Victoria (Mikoa ya Kagera, Geita, Shinyanga, Mwanza, Simiyu na Mara) inatarajiwa kuwa na vipindi vya mvua zinazoambatana na ngurumo za radi katika maeneo machache.

Nyanda za juu kaskazini mashariki (Mikoa ya Arusha, Manyara na Kilimanjaro), Pwani ya kaskazini (Mikoa ya Tanga, Maeneo ya kaskazini mwa Morogoro, Pwani na Dar es Salaam pamoja navisiwa vya Unguja na Pemba) na Pwani ya kusini (Mikoa ya Mtwara na Lindi) inatarajiwa kuwa na mvua nyepesi katika maeneo machache.

Magharibi mwa nchi (Mikoa ya Kigoma, Katavi na Tabora) na Kanda ya kati (Mikoa ya Dodoma na Singida) inatarajiwa kuwa na mawingu kiasi.

Nyanda za juu Kusini-magharibi (Mikoa ya Rukwa, Songwe, Mbeya, Njombe na Iringa) na Kanda ya kusini (Mikoa wa Ruvuma na Maeneo ya kusini mwa Morogoro) inatarajiwa kuwa na mawingu

kiasi kwa ujumla.

**MATARAJIO NA USHAURI WA KILIMO
KATIKA KIPINDI CHA AGOSTI 01-10, 2018.**

Hali ya ukavu inayotarajiwa itasaidia kukomaa kwa mazao pamoja na shughuli za uvunaji na uhifadhi wa mazao. Hata hivyo hali hiyo itasababisha upungufu wa maji na malisho. Wafugaji wanashauriwa kuchukua hatua stahiki ikiwa ni pamoja na matumizi endelevu ya maji na malisho. Vilevile, wakulima wanashauriwa kuhifadhi akiba ya ziada ya chakula na kukitumia kwa uangalifu kuepuka upungufu wa chakula, hususani katika maeneo yote ambayo shughuli za uvunaji zimekamilika.

Kwa maeneo yanayotarajia mvua za nje ya msimu, wakulima wanashauriwa kutozitimia kwa shughuli za upandaji mazao ya msimu. Wakulima, wavuvi na wafugaji wanashauriwa kuwasiliana na maofisa ugani kwa ajili ya kupata ushauri zaidi.

**HALI YA MAJI INAVYOTARAJIWA KATIKA
KIPINDI CHA AGOSTI 01-10,2018.**

Kina cha maji katika mabwawa na mtiririko wa maji kwenye mito vinatarajiwa kuwa vya wastani katika sehemu nyingi nchini. Hata hivyo, wananchi wanashauriwa kutumia maji kwa uangalifu kwa matumizi endelevu ya rasilimali hii.

Jarida lmetayarishwa na:

**Mamlaka ya Hali ya Hewa Tanzania
Ghorofa ya 3-Ubungo Plaza – Barabara ya Morogoro, Dar es Salaam-Jamhuri ya Muungano wa Tanzania**